



記言別集九二十

丘墓

廿二十一

~ 16
2346
20



和
2846
2/20

記言別集卷之二十四

丘墓文

守江原道觀察使禹公墓表陰記

穆愚下少時未及師事公後從前輩聞閔先生稱公曰豪傑之士然後穆益慕公之為人聞公之一言一行皆識之公之側室子某嘗見余於連上謂之曰先人墳墓在分石將埋後無以表之願得一言穆以慕公之心忻然欲諾之顧以淺陋不敢諾也未久其人死其弟某繼其亡兄之意位而言余感其言即書其墓表曰公諱伏

樂善堂

龍字見吉姓禹氏本丹陽人其別號懼庵少時從幸村閔純先生學十四先府君歿其居喪之節一如成人觀者皆以為知禮及長從柳眉岩許草堂諸公始知名於世二十六為大夫入始應舉明年癸酉陞上舍公舉止詳嚴無戲狎諸生皆重之多擬為模範每以時三公帥六卿入太學試諸生諸生序列拜於庭下公獨揖而不拜禮官召責之公對曰非君臨之禮諸生不當拜庭下自世祖為國相時始行此禮其後趙文正公以為非禮罷之及南袞為相既嘗多殺

士類怒諸生謗已遂復其拜小儒未達其宜不敢拜皆稱善定為揖禮出復禮賦擢公為第一丁丑公應選初仕為文昭殿叅奉用太夫人之命也因廢舉曰既入仕而復求舉非義也已卯改永崇殿叅奉右議政李公鐸吏曹判書李公珥交薦之後陞內膳寺直長明年陞宗簿寺主簿轉工曹佐郎壬午為木川縣監四年以治理第一陞金浦縣令其明年觀察使又上治效賜帛廢之其十月入為司憲府持平時太夫人歿既葬居廬於是有講禮答問已丑為龍宮縣

監壬辰春倭大舉入寇而慶州河陽境有亂兵作亂官軍赴援者連敗人心大懼公發縣中兵合醴泉兵三千過河陽遇盜力鬪盜敗散追逐得六十人縛而數之曰若罪當斬無赦費從當宥今慶州朝暮且急立功則更有賞皆伏斬其首亂者三人前驅未至慶州三十里止舍夜盜急擊官軍醴泉兵亂既射殺其領將其前擒者皆奪之公既整軍遲明引至慶州以兵屬節度使當此時慶州已急而上游援兵至者惟公所領兵三千而已於是賊連勝遂前諸城大潰公

還縣募鄉縣子弟得二千餘遇賊數十合縣得全事聞上手札寵獎之賞加通政大夫十月陞安東大都護府使乙未李文忠公某為領相體參兵馬巡行南方州縣有河陽人訴之曰某前任龍宮時領兵到阿火驛濫殺河陽之人體府按驗其狀盜黨得攀緣士大夫以為叟據而更革面反訴如此李公怒執其反訴者斬之軍門事在李文忠公事中方賊乘勝天子遣將殺我賊大窘據我南境邊海久為賊所而提督既復三京自以功多其意已怠復疑畏窮寇尚強

一朝挫折無前功以大兵屯忠州以觀望時經
略責提督以賊已敗北而不追擊出境為咎促
進兵不已公至軍門見提督為言南方地利險
阨人心日望大軍來臨而賊方窮縮狀提督大
悅乃出兵南下而實無聞心於是公當板蕩之
際賑飢勸農給餽餉不絕 上賢其勤勞賜粧
馬以賞之時戶曹判書闕 上令大臣薦其人
左議政金公應南右議政鄭公琢皆曰無愈於
某明日領議政柳公成龍白 上曰某賢能固
當大用安東嶺南要衝保障之地某方得吏民

心今若召還百姓失望 上乃寢其薦公為安
東五年上疏自陳仍及時獎其略曰臣所陳者
搜槩而已其小者煩屑而不暇舉其大者忌避
而不敢盡臣罪大矣正朝廷立紀綱愛養民力
修明軍政今日之急務而其本在 殿下之一
心豈有大本不立而朝廷自正紀綱自立軍政
自修者也 殿下非不恤民而民生日瘁非不
理財而財用日匱非不治軍而軍政日紊其於
恢復之圖無異却步而求前此不過大本不立
其所以行諸事業者文具而已今日降一旨明

日行一事徒紛紜卒無歸宿委靡渙散如日將
暮臣每念及此不覺流涕繼之以痛哭 上嘉
納之即許其代冬拜江原道觀察使上疏力辭
時倭再入寇既請救於中國舟師循海路至江
華 上將擇遺其守難其人諸大臣僉曰某前
為安東功績著聞領議政嘗在朝亦稱其賢能
以為非此人不可 上然之即有江都之命
公受 命即行府中皆喜得 後王叅政與語
大悅曰子以清選出司錢穀不其少用之乎昔
蕭何守關中轉輸不乏卒成漢業子得毋與蕭

相國比耶時妃嬪諸公子皆在江都公奉給無
厚而守法甚謹以故掖廂私屬多憚之時適有
軍門將士卒至坡州出不意悉芻馬之供不及
本州當罪而公揔掌凡兵馬供給諸事故竝詔
獄尋罷出其後連擬望天曹政院龍濟尹嶺南
觀察使 上皆不用右議政請 上曰不用某
竊不知其故也 上曰不忘矣己亥為洪州牧
使明年兵馬體察使李公恒福啓聞某政有條
理禮讓化俗云 上命進階嘉善大夫有當路
者惡之力攻之卒改正而繼有廢聞故 賜帛

言言集卷之二十四
寵之尋罷辛丑大臣薦之為忠清道觀察使上
疏辭之正言宋淳嘗不悅啓上曰某雖以經
學擢用他日門蔭之希冀濫越者因此以為藉
口上不聽嘗臨朝問曰某久不辭朝何也大
臣對曰某名節之士臺諫論之必不出請改之
即日改羅州牧使上曰大臣言之欲治羅州
以為保障之托公居羅州三年御史連上治績
上加寵賜資之丙午拜忠州牧使居一年罷戊
由上既昇遐光海君嗣位而李文忠公復入
相建大同法推薦公攝宣惠廳事時臨海君欲

事大起而鄭仁弘始用事公語仁弘曰保初節
雖易保晚節實難老入脩門勉保晚節仁弘心
不悅公告人曰德遠非前之德遠當絕因不
樂仕宦與宋仲懷書曰羈縻宣惠之後徒費廩
粟前頭之憂不在民役之均不均北村烟月閑
送餘年此第一計也遂謝病秋為錦山郡守見
世道日非益無意於世棄官歸後有成川之
命不起而有臺諫李昌後竟劾之壬子鄭仁弘
入為左相嘗過之公曰朋友之道道不合則絕
謝不見公既與世俗相踈絕不復繫心榮辱潔

身獨行以自娛明年癸丑歿於麻田之無茅庄
無茅庄者在壺口峽裡江上別業公天資卓犖
好言論臨事善謀嚴於義利邪正之分君子慕
之而小人多忌之其學篤於人倫察於事物尤
致勤於報本返事之節而推及九族親戚之飢
寒無所歸賴公而得其生養者如恃父母治之
郡邑百姓之窮無告者咸得其仁而如閭巷之
善行皆無不表獎而加勉之於是賢愚皆服其
德而方國內大亂公私板蕩當事立辦不失機
宜我 宣祖世稱良二千石公為第一事業雖

不大施於一世亦其較著可述者如此而孔子
曰邦有道則仕邦無道則可卷而懷之其進也
有禮其退也有義能立不撓邪世不能亂亦可
見君子之偉然者矣信乎豪傑之士也公六十
七歿公高麗門下侍中天錫之九世孫也曾祖
孝親我 成宗時以遺逸徵為掌隸院司評皇
祖舜佐皇考崇善皆有隱德高行至公乃大發
云母李氏古甲子名人再思堂龜之孫也公娶
宋夫人無子有外孫曰之恒光海宰相某之孫
進士有側室子五人敬彥敬資敬弼敬民敬錫

敬弼嘗舉進士早歿敬錫以科第得仕今為永平縣令

石潭李公墓碣銘

公諱潤雨字茂伯姓李氏別自號石潭其先廣陵人高麗時有判典校寺事集古之闕人子孫連為大官顯者四世至承仕郎摯始居星州於公為高祖曾祖諱德符成均進士祖諱遵慶早世父諱熙復賢而不著後追爵承政院左承旨毋道州金氏圖書署別提崇祖女也公少師事鄭寒岡先生聞為學之方二十三取進士後十

六年選博士科補成均權知光海初為政院注書兼記事平改藝文檢閱兼侍講說書時鄭仁弘方用事公在史局直書其所為為韓纘男所劾去後陞待教奉教皆不就連貶官以典籍出為輸城道察訪鏡城府判官輸城鏡城皆絕塞累千里鏡城古石幕之墟其俗雜胡羯尤難治公為政以誠善推恕既還其人治鑄鐵碑追思不已既時事大變不復以仕進為心講禮於泗上庚申鄭先生歿行心喪之禮癸亥仁祖既反正召拜禮曹正郎旋改司諫院正言尋薦至

堂以修撰陞校理甲子李适叛上南狩以公嘗
出北路得吏民心特拜招諭御史冬為應教論
政弊仍白上曰君臣之禮太嚴抑損天威以親
臣下上從之丙寅有啓運之喪一用后妃禮公
方為司諫歷舉違禮大者六事力爭上怒遞司
諫改成均司成尋遷政府舍人知製教明年行
世子嘉禮公以輔德加通政出為潭陽為政必
先學教禁奸猾邑大治去後有政清碑又有興
學碑卒未為工曹叅議後年患風痺辭疾歸臣
里三年而歿自朝之大夫士以至草野韋布莫

不曰君子人亡矣相吊如親戚公嘗以靖社原
從既歿追爵吏曹叅判公生於隆慶三年十一
月四日歿於崇禎七年八月二十九日年六十
六其十二月十五日葬陶唐之洞南向之原公
遊於大賢之門其居家事父母處昆弟固君子
善行而能直而和嚴而有容事君以直道聞治
郡必以教民善俗為先居陋室恬靜與物無競
好讀書常謂子弟曰天道福謙人道忌盈吾起
自寒門官至大夫之列亦足矣幸無人過得正
而斃吾日勉焉者也平生行己必正辭受必謹

守道不苟一以興學右文為心夫人仁川蔡氏
國子生貞應憐之女生三男二女子孫繁衍其
顯者次男道長為弘文應教道長長男元禎司
農亞卿次男元祿長淵都護府使元禎長男聯
命初仕為成均學諭子孫俱列于左其銘曰
確而廉和而不疵可以教可以儀君子哉魯無
君子斯焉取斯

黃山道察訪鄭公墓碣陰記

府君諱擢字 姓鄭氏其先慶州人我 太
祖功臣左贊成鷄林君熙啓之六世孫也皇考

漢城府庶尹諱明善敦寧府都正諱世賢之次
子而為伯父朔寧郡守諱世豪之後二公皆受
業於朱溪君以才學聞妣咸悅南宮氏觀察使
淑之女嘉靖二十年辛丑八月廿六日府君生
己卯選司馬試己丑以公薦除黃山道察訪壬
辰兵革大起府君避亂於朔寧其八月二日府
君歿嘉靖中先王父為郡時府君生四年王父
公歿於官其後五十二年府君又客死於此嗟
乎死生皆有命天也葬于麻田郡治西十里獨
將洞鄭氏族葬府君嚴正有法度善楷書皇考

慶尹公以書名世蓋其筆法有自而今其子孫亦多以書稱者宜人昌原黃氏右贊成士佑之孫而成均生負瑞奎之女也與府君同年十一月四日生府君既歿又其年同月十三日宜人歿而合葬焉有一男四女男時郡守贊四人郡守洪瑞龍進士任大祿縣令朴傲叅議宋克訥孫二人弘基昌基昌基進士內外曾玄孫一人而於宋氏無子

清道郡守鄭君墓碣陰記

公諱皓字

姓鄭氏本慶州人其先始大於

高麗至麗之末世有侍中暉最野生左贊成熙啓佐我太祖有功封鷄林尹謚良敬良敬公生虎賁衛上護軍吉祥上護軍生判漢城尹之禮判尹生石城縣監守德縣監二子朔寧郡守世豪敦寧府都正世賢皆以才學聞都正以長子惟善貴為觀察使故以恩例縣監 贈禮曹叅議都正 贈吏曹叅判郡守無子以都正之次子明善為後明善為漢城府庶尹庶尹生擢黃山道察訪娶昌原黃氏成均生負瑞奎之女隆慶五年辛未六月十八日公生萬曆三十一

年癸卯初仕為翊衛司洗馬一年陞侍直二年陞副率又二年陞衛率衛率二年陞翊贊三年移司憲府監察一年以軍資監判官為順安縣令六年以治理聞上特賜表裏陞通政仍任一年天啓癸亥我仁祖中興之年為陝川郡守崇禎戊辰為清道郡守甲戌行長水縣監明年五月十八日歿於官年六十五其九月歸葬麻田郡治西十里獨將洞鄭氏族葬夫人幸州奇氏 贈領議政應世之女判尹 贈左贊成大恒之孫弘文館應教 贈吏曹判書遵之曾

孫也隆慶六年壬申三月廿七日夫人生崇禎九年丙子六月十一日歿明年九月祔葬同塋公平生好良善與人無爭居家任職皆無怨於人人亦無忤於已也奇夫人又有賢婦人之德公既歿夫人哭之暮年而卒至於滅性云有二男三女男弘基昌基進士長婿佐郎李時必次二婿沈之河慎覲弘基子華岳東岳東岳進士婿鄭敷昌基子喬岳恭岳婿李后沆進士李時必子廷隣聖隣聖隣都事沈之河子樞楫格婿二人李粹芳朴由潤慎覲子萬徽萬憲婿

持平慶寂郡守李悅李東者許嘗金季珍

贈左贊成趙公墓碣銘

趙氏其先本漢陽人其胙土命氏蓋久矣高麗世有諱之壽為僉議中書事生雙城摠管暉摠管生良琪襲爵十三從金方慶征日本又專征哈丹獻俘于元元世祖賜玉帶錦袍以廢嘉之於是聲名聞天下生龍城君暉龍城生左政丞仁璧謚襄烈襄烈生右議政洵謚良敬良敬生同知敦寧憐同知生司饗判官云明判官生縣監英傑縣監生察訪壽崑善章隸名於世後以

大奎加折衝折出生佐郎玆於公為皇考妣全州李氏我太宗諸王子謹寧君禮之後而成均生負克誠之女也公諱翼男字敬所自為兒時敦厚則見嘗幼嬉戲拾庭杏落者一聞先府君教戒終日不近口先府君心賢之比長學於王方丈人洪春壽能勤苦日讀不倦同學皆莫及也丈人常嘖嘖言此子立志如古人公蓋於書尤深於太史公壬辰之亂先府君從宦在嶺海千里道不通公奉母夫人避亂大嶺之西其主人見公事母至誠心悅之資其有無無所愛

人皆曰孝子之感人也癸巳出嶺南母夫人歿於居昌方師旅飢饉而其治喪之節如衣衾棺槨凡附於身者必誠必信而無憾焉人以為難甲辰以先府君命應吏選初授繕工監叅奉職主鴨島刈菑事役用雇人其受直怠事者率勢家私屬公一繩之後民大均其民至刻石不忘云丙午先府君歿既卒哭返先夫人鞠合葬焉時公將五十始裹猶食蔬食居廬三年不脫經帶晨夕上塚哭不避風雨每朔望殷奠一日水溢無以供具忽有鷲鳥擊雉墮於廬外奠不曰

異哉至誠所感蓋有如此云既三年以孝聞儀曹除司贍寺叅奉事癸丑四月二十二日歿公生於嘉靖四十三年歿於萬曆四十一年僅五十其六月丙申葬于抱川北十里乞塋南東向之原與柳夫人隔葬異塋任修撰叔英作壙銘宋夫人葬在下公孝友出於至誠其居家事親服勤就養思必盡愛之道而尤致謹於喪祭猶恐其不得盡於禮也如宗族交友亦各得其心官雖庫必思盡職平生不以喜怒形於色有所著表賦在紙各累百篇嘗登名解額者且

數矣終不以文學見亦命也前夫人文化柳氏
贈左承旨愷之女而正郎思新之孫也生一男
一女男判中樞綱督縣監尹悅之夫人聰明有
至性善事舅姑子女方未長雖在流離中飲食
必有節衣服必以時令遊戲有常處鄙倍之言
毋得出於口判中樞常言不肖之稱人由父母
教然也夫人少於公一年三十四歿後夫人鎮
川宋氏左承旨賀之孫而司贍寺奉事應一之
女也溫良極順篤於祀事至老不怠生一男三
女男緜少有學不幸早世婿士人姜錫璜姜益

章縣監許岌判中樞十三 贈貞敬柳夫人歿
宋夫人撫之如已出長而以魁科顯歷事 二
朝貴逾九卿又以壽考進崇祿追爵三世折衝
府君為吏曹參判佐郎府君為吏曹判書公為
議政府左贊成宋夫人以貞敬夫人壽八十七
歲夫人少於公十五年自判中樞登顯仕之至
至今四十三年榮養備矣判中樞室吏曹判書
金瓚女生一男三女男威鳳文科為便養方為
金化縣監督縣監李惟楨直講李惇臨生貞李
并徵悅之生二男二女男縣監坤參奉壻督牧

使李河岳儒生趙元鎮錫璜生二男一女男游
渭游叅奉婿直長尹梅益章生一女婿南煥豈
生一女無子有所後子燈進士婿權德任生貞
緝室同知李顯女生威明世子翊衛司副率威
鳳生二子九輅九畹威明又二子九鼎九岭内
外至三世四世幾百人銘曰
惟孝友敦且淳積行累仁不發於其身宜其有
天道之報啓祐其後人

贈戶曹叅判法公墓碣銘

公諱履一字享五姓洪氏南陽大姓高麗大師

殷說之後也世有達官巨人至本朝 康靖時
有左議政應功業最大謚曰忠貞忠貞公生唐
陽尉常尚明淑公主以儀賓貴又以元功子襲
封唐陽君唐陽君生伯慶以武科貴歷諸道節
度使入為戶曹叅判乏祀以忠貞公弟太學生
貞恒曾孫允祐為後以禮賓寺別坐進 贈兵
曹叅議於公為曾祖祖諱德壽高城郡守 贈
吏曹叅判父諱思叢歷治州郡以治行顯以行
判決事卒 贈左贊成母光州金氏都護府使
秀淵之女也長子得一以科目進為閔東觀察

使公為仲子我 昭敬王十六年八月二十日
公生至三十九年公二十四以名譽拔擢連為
郡縣以治績聞當廢王時見世道大亂以旌善
郡守去歸寓居可興大江之上四年有 仁祖
反正之事其明年公四十一為戶曹正郎出為
州郡前後歷治二縣四郡一州一府為政廉平
所至皆有政清碑去後百姓追思不已大丘時
當丙子之亂大嶺以南兵革不及士大夫避亂
者多從之公周恤甚善客皆喜過望公私謂曰
當此時吾得專城之饒而豈可躬自厚而視人

之乏餓也況士大夫之失所流離者乎亦非為
私也人皆賢之一日觀察公戲之曰居官政清
固善矣其奈子孫何公笑曰行已無負此心足
矣以此遺子孫後世不為不厚故公家庭教育訓
不出直道孝友二事而已公平生以屈已媚事
人為恥公州時與用事者不相悅即去歸後卒
為所中以沔川郡守罷坐廢者二十餘年公處
之夷然不以拓落介懷無事從溪山水石蕭散
自娛以至老 顯宗七年正月十九日公八十
四以壽終葬安峽縣治西六里祭堂北阿公初

娶玉城李氏生一女其壻監司李天基再娶綾
城具氏生必亨泰亨又一女其壻中曼三娶牛
峯金氏生重亨始亨重亨為湖南右水軍節度
使又四女其壻佐郎李消李壽箕宣傳官尹熙
慶李東魯又庶出女四人其壻黃道碩進士金
重鍊僉知柳胆生負姜斌子孫甚多惟中曼無
子義絕銘曰
簡而庶直而無競嗚呼壽考之正

贈禮曹判書姜公墓誌銘

公諱翼文字君遇號慙庵姓姜氏本晉陽人自

其四世祖承顓徙陝川遂為陝人大父仁壽父
世倬以子孫之貴追爵仁壽為司憲府執義世
倬為同副承旨公少以詞賦致名譽二十二已
丑進士三十九丙午增廣及第戊申以成均學
諭兼諱院說書光海元年己酉以禮曹佐郎四
年之間三為正言四為獻納六為持平五為文
學癸丑以掌令移弼善改濟用監正文再為司
諫時有大獄李文翼公德馨諫永昌事論以按
律公不肯從始貳於時議甲寅光海殺永昌鄭
公蘊上疏極言以大逆論死公即偽疾辭官而

長男大遂在諫院亦以爭論得罪公貶忠原縣
監卒為所中陷於縲紲者九年或私說曰縲紲
良苦方今廢毋妃事急何不令子弟上疏言此
事因且釋矣公慨然以死拒之癸亥 仁祖既
反正公遂得釋辛未為典籍有論者言前事欲
沮之東都公上疏具陳終始其事乃釋明年由
奉禮復為濟用監正入謝即去歸田里閑暇自
娛以壽考終以齒與陞通政後推恩例追爵禮
曹判書公平生不喜華麗衣取便體食取適口
而已常戒子弟曰毋以老父故受汙性慤慎不

事外餘與人無表襮見不善與之不少假以故
不善者多不說公生於隆慶三年正月十三日
歿於我 仁祖二十七年五月七日為八十一
葬於宜寧之洛西貞夫人陝川李氏亦八十九
歿而祔葬生三男二女長男大遂守東都尹三
娶而生二男三女男徽衍徽萬壻三人縣監李
堂揆金庭翊李時格又有庶出子徽潤壻李命
吉次男大適生徽敏徽重徽望壻二人趙璉吳
善基又庶出子徽俊徽傑少男大延生徽鼎徽
晉壻三人李斗樞金塗宋廷泰長女適別提李

汝漢有四女婿鄭有佑安時進李義謙河自渾
次女適叅奉鄭惟熟

愨而直質而淳惟壽考之祺又以子孫之振振

承政院右承旨姜公墓碣銘

公諱大遂字學顏姓姜氏其先本晉陽人高麗
太師民瞻之後也累世居陝川為陝人曾祖仁
壽 贈司憲府執義祖世倬 贈同副承旨父
翼文司諫院司諫 贈禮曹判書以公貴故得
推恩三世母貞夫人陝川李氏萬曆十九年癸
卯六月二日公生聰明嗜學自少時得才名甚

盛聞者多慕與之交一十選國子試後年登第
初授侍講院兼說書尋陞司書遷司諫院正言
明年甲寅光海殺永昌鄭公蘊諫而當死公以
爭論并得罪時鄭仁弘方貴用公嘗指之曰執
拗私意喜人佞已以故深疾之至此因擠陷不
已初削官竟付處淮陽公刻苦勵行能得處困
之正人皆賢之癸亥春 仁祖既反正釋為寧
邊府判官即改戶曹佐郎秋陞禮曹正郎明年
以正言移司憲府持平尋陞掌令兼編修官丙
寅復為掌令知製 教丁卯有虜亂為號召使

鄭公經世從事出嶺南募諭尚慶子弟收召義
兵三月虜既和親乃罷兵四月陞司諫院司諫
累轉宗簿寺正戊辰出順天三年以病去當罷
上命遞職而已卒未入玉堂為副修撰兼 經
筵檢討官後年春陞修撰尋陞副校理兼 經
筵侍讀官夏改軍資監正兼侍講院文學秋出
為靈光癸酉復召為修撰甲戌在玉堂論追崇
之失禮凡五劄累千言乙亥秋由司諫移濟用
監正冬以繡衣廉問湖西去守令不用法尤甚
者丁丑春為副應教戊寅夏復以司諫出南原

明年陞通政為東萊辛巳為晉州三年以疾罷
甲申春為同副承旨兼 經筵參贊官至右承
旨夏改兵曹參知尋陞參議論海西軍案積弊
變通事 上從之冬出尹東都明年冬以副護
軍上東宮喪制疏丁亥由判決事復出密陽明
在 以父憂去 孝宗元年庚寅應旨上萬言疏
冬復以判決事再入政院後年三月為全州大
尹一年去此後連有 召命而以母老皆不起
丙申春又應旨言時事有奢侈太盛私意橫流
之戒戊戌四月十九日卒年六十八葬宜寧洛

西 上以禮賜祭而遠近皆曰賢大夫亡矣公
立朝近五十年怡心謹慎裨益既多而又賢於
治郡去後皆有遺愛晚年自號寒沙晚隱好讀
易日誦一卦以潛玩焉作石泉書齋以待學者
同郡作伊淵書院宜寧作德谷書院眷眷於儒
者緒業而考其家狀公重儒術尚溫雅恭儉謙
廉為平生受用之法云公三娶而有二男三
女前夫人宗室寧堤君錫齡之女生一男曰徽
衍後夫人叅奉李毅之女生一男三女男曰徽
萬簪三人縣令李棠揆士人金庭翊李時格未

娶鄭夫人縣監暄之女無子又有側室子曰徽
潤銘曰

惟恪惟謹惟大夫之飭也惟儉惟恭惟大夫之
式也

東巖公墓陰記

公諱詠道字聖與別號東巖姓李氏本真實縣
人大父諱滉判中樞府事 贈領議政謚文純
父諱騫軍器寺僉正母奉化琴氏司導寺僉正
致湛之孫訓導某之女嘉靖三十八年己未九
月十一日公生自為兒時敦厚特異文純公曰

異日綿吾世者此兒也十三琴夫人歿其哭泣
之哀居喪之節一如成人又十三年僉正公歿
有二兄皆不勝喪死公獨守喪居廬宋公言慎
崇恭使嶺南入其鄉為之哭吊而去既復命
上曰南中有何事對曰無他事故儒臣某之子
某死而其二子皆哀毀死有少子某累然居廬
而哭亦不忍見也 上為之歎息仍命俟其服
闋官之不次既三年除軍資監叅奉累轉濟川
監奉事及壬辰之亂 上西狩急百官多徒步
從 上上問之非侍從令勿從也以故公南歸

為安東義兵從事明年九月為連原道察訪時
忠州缺牧使公兼任七月州民大悅上書借公
為牧使時當大亂列邑皆用武人以治兵公以
察訪兼州判官攝牧使事方師旅飢饉既殫財
力以賑飢募人耕數千頃田秋大熟得穀萬斛
板蕩之後州有積儲始此丙申適去後累有除
命皆不就明年五月以戶曹多事須得人舉公
為佐郎後月經理渡兵龍濟問兵食備局以能
特遣公公条列便宜應對詳密經理大賢之事
聞特陞正郎復命 上面勞之仍賜醞寵待之

殊甚時大軍南下廷議以公長於籌畫先遣之
以備餉公至安東先移列邑調度轉輸身從大
軍於東都給餽餉不乏秋仍以版籍郎驗災於
本道明年為玄風縣監一年以治理賜表裡又
一年陞金堤郡守四年陞青松都護府使及光
海四年為司僕寺僉正仍陞軍器寺副正尋出
為榮川郡守乙卯自榮川見世道日亂無意
仕宦累官皆不就自守十年 仁祖反正之年
為益山郡守己巳為繕工監僉正謝恩即去庚
午春為內膳寺正其冬為原州牧使有有力者

爭入葬地怒其不售卒為所中 去丙子八月為
軍資監正以老不就明年二月廿六日歿年七
十九其十月葬于文純公墓左南向之原淑人
權氏忠定公撥之孫也有二男長岐以幾岐啓
功郎嶽社稷署叅奉又有庶出子女四人男嶧
女三人其婿朴以煥金從善李所岐生希哲克
哲女三人其婿琴三達琴聖徽任憲聖徽進士
嶽生命哲誠哲信哲允哲命哲慶基殿叅奉誠
哲山陰縣監女三人其婿柳敬之高爾齡黃石
來嶧有一女嫁生貞鄭日知無子有繼後子後

指朴以煥二子垣增金從善二子鑄錄鑄進士
李研三子塙壘塙有六女長鄭佑周妻次李汝
舟妻餘四人幼初宗家絕嗣諸弟子皆曰伯仲
皆早世而無子今叔當為主公不忍伯氏之乏
祀也公攝祀事疑既長令為後於伯氏公平生
篤於宗族忠於交友好與人為善當官盡職不
問卑顯凡六為州郡令舉而事修一以便民利
物為心去後皆有遺愛焉公既歿十三年以宣
武原從追 贈承政院左承旨銘曰
確而夥敦厚而無侈于官于家小人所懷君子

所多

進士韓君墓表

公諱璿字休景姓韓氏韓氏系出上黨我開國
相文簡公尚敬之五世孫而文襄公繼美之曾
孫驪州牧使嶽之孫禮曹正郎亨信之子宗室
昌化君長孫之外孫也嘉靖十一年六月廿七
日公生早孤為後於伯父副司直亨俊隆慶元
年我 恭憲廿二年三等進士性孝友事母無
違志姊妹兄弟之貧者其衣食服用多出於公
人以是賢之閑雅善談笑治園林每以令節會

宗族交友飲醉為樂一時貴遊名勝多從之年
五十二終萬曆十一年五月十九日葬于安山
烽峴北麓妻李氏我 太宗別子孝寧大君補
之後而署令仁弘之女有婦德公之孝友行於
家亦多賢婦人之助一門歸心焉嘉靖五年十
二月十八日生萬曆二十一年七月四日歿年
六十八合葬安山舉三男二女長男彥恂秩從
二品次彥恒彥愔許愔李燭彥恂生潛洧洧
潛副司果洧以武舉官至三品彥恒無子彥愔
生一女婿沈景鼈潛生德亮

司憲府監察鄭公墓表

公諱若字順勝姓鄭氏其先本晉陽人高麗名
臣鄭言孚之六世孫而我 明宗諫官鄭思顯
之子也十六先府君歿事母至孝好儒術我
宣祖二十二年以行誼選為齋郎明年李氏歿
鄭氏先葬皆在上黨因守塚不去時有倭寇郡
邑皆潰賊連陷三京國大亂州父老謀舉義兵
鄉有前郡守趙綱長者眾推以為將綱辭曰吾
已八十老不能同州鄭若賢可任將且名族欲
拜將無出此人其人居憂以義強起之無辭以

拒之也既三返乃起於是傍縣諸義兵多起而軍無見糧公首募義粟以給軍食軍勢益張自金公汝叻敗沒於忠州其老母奔竄客死連山公為之棺殮以歸聞者義之癸巳賊既約成屯海上冬車駕還京有事公召至京師為司醞署奉事明年夏特拜司憲府監察公既病革未謝為洪川縣監已歿矣年四十八後論功賞追爵戶曹叅議夫人仁川蔡氏世子左弼善倫之五世孫也夫人事姑有至誠稱善行先公七年而歿及公歿合葬於廣州治東石林江上之原有

二男三女以謙以濟壻三人察訪黃澹士人韓逸具濔以謙生民瞻成均生貧無子女壻五人尹蔭朴弘遠朴大震成夏績李匡濟皆士人以濟生民覺民逸民獻民獻成均館學諭壻五人教官金重榮丁時栻洪慶敏尹徵禹南宮塹韓逸生有行有衡有衍有壻二人李幼澄郡守柳時成黃澹具濔無子

文城君墓碑銘

公子諱健字仲以 成宗諸王子景明君忱之孫安南君壽鍊之子母青松縣夫人沈氏弘文

館典翰義欽之孫公子十六為後於鳳城君坑
鳳城君 中宗諸王子而死於乙巳獄者也

宣祖世釋其寃復其封爵之後令不絕其祭祀
公子初以文城副正陞正二品封為君公子好
施與善於行誼號為佳公子鳳城君一女公子
權重之遺財必薄取而厚奉給宗族愈賢之公
子善言射藝絕人 上悅之每賞賜之甚厚
壬辰之亂 上西幸公子奉縣夫人奔竄朔北
淮陽途中遇即府從事巡過關東郡縣者具言
賊塞路無因緣以達行在狀從事問之指間路

資送行在 上即召見賜食慰喻拜尚食提調
累轉都檢管典禁兵丁酉從 懿仁王后於遂
安己亥賞扈從群臣公子進階崇憲 上會文
武宗親親臨試射有一宗室善射者與公子爭
的未有勝負勝者當受爵其宗室私謂公子曰
公子絕藝何可當也但願受賞爵以悅老母心
公子賜也公子許諾當射故失的以讓之觀者
大悅莫不曰公子之高義也當光海時有宗室
數輩欲私結寵幸上疏助為廢母后之說欲假
名於公子勸起之勤以福禍公子嘆曰吾老且

死義不可負 先王於今日因不出慷慨憂傷
飲醉自遣及 仁祖改玉公子已久病扶疾入
賀疾漸劇仍卒癸亥三月廿六日享年六十四
訃聞 上震悼不視朝二日 賜賻如儀以禮
葬于揚州治東獨將里南向為封公子以宗室
尊屬未嘗以貴盛加人恪慎不懈待僚屬有禮
禦吏胥有恩居家無事治園林植花卉樂與賓
客飲懽一時名譽之士多從之遊光海時見世
道日亂遂謝客以壽終初娶慶州金氏 宣祖
相忠翼公命元之女封鷄林縣夫人早卒後夫

人慶氏高麗名臣慶復興之後而同中樞時宏
之女又早卒無子金夫人生一男一女男始林
君世俊婿敦寧府都正具仁基側室男漢陽守
世柱始林君生一男二女男靈昌正格二婿觀
察使洪命一士人金益重漢陽守生三男六女
男完昌令搃甄昌令摠安昌令摠督崔沄金益
聲季純仁李敏培女未嫁者二人其銘曰
篤而和且夥宜其見義守死不易其志

贈議政府左贊成權公墓碣銘

公諱暉字晦可姓權氏系出安東高麗太師幸

之後而我國初名臣文忠公近之七世孫也曾
祖 贈領議政勳祖 贈左贊成軹父 贈判
書恠母鎮川林氏嘉靖三十三年甲寅公生性
介潔自在髻鬢已不與凡兒比見者竒之及就
外傳自知力學長而益勵簡正自飭嗜古文非
先秦兩漢之書不讀也於文一趣古人蹊逕不
喜徇俗為決科之利後祖權公轍為宰相高其
志行欲官之見公無屈意慙益賢之先府君嘗
歷典郡邑公侍側不逾尺寸無一子弟之過先
府君稱之曰吾見子弟侵官政累父兄者多矣

吾兒有是吾上辰兵革大起公曰挾贊草間免
於累害者鮮矣不以貨物自隨奔竄道路奉養
老母動以至誠行路賢之春先府君為錦山其
地陷為賊所先府君臨亂不去死於官守而方
伯得罪事不上聞後公從草土上書其事得顯
上嘉之追 贈某官命錄用其後初先府君死
郡人為之收殮焉公入賊中求殮以返父老歎
曰賢哉孝子之至誠也公素多病居喪毀感三
年遘癘疫客死保寧甲午七月廿一日年四十
一是年有齋郎之命而公已歿矣公疾病以初

喪之禮屬其妻李氏曰吾客死無親戚顧我勉其禮令毋憾於正終也既歿李氏自襲至殯一
所指因旅葬其鄉哭泣哀甚每祭祀必陳新衣服祭畢藏之後二一四年改葬易棺而殮殮用藏衣服後家貴盛夫人食三牲之養年至耆耄祭祀必親之有新物非薦不嘗哭之如初林夫人年高竟致養五十年至誠不怠教子孫必以奉先悌長慎言為戒為家惠而能嚴使長幼上下斬斬有分無一苟且隳家法也以恩例追爵公左贊成夫人為一敬夫人夫人籍慶州都

事希參之女進士夢奎之孫崇禎十三年七月十七日夫人歿為八十八歲與公合葬于抱川注葉山西麓長男縉為判書次綵為郡守皆無子次統為副正次緒為主簿又二男早歿一入金光燧為某官統生二男二女男侑脩侑縣監脩學諭為伯父後婿二人持平沈世鐸執義沈儒行緒生一男三女男偉進士婿三人韓奎一宋基昌申濂奎一為都事內外曾玄孫四十餘銘曰
不苟不汙志高而行潔歿身不怠而其子孫之

遺濟濟而揭揭

贈吏曹參判姜公墓碣銘

公諱秀崑字汝鎮姓姜氏其先晉陽人我中
廟功臣永善君漬四世孫也永善君生僉正世
琛世琛生 贈執義礪礪生 贈參判應運應
運生公母宗室女文川正壽甲之女也公生七
年父歿養於外姑姑 懿仁王后之母也有祖
母年高奉養有至性一日姑饋肉公受而不食
姑問故公曰歸遺祖母姑心賢之日給甘旨
宣祖十五年初仕為昭格署參奉累轉漢城參

軍壬辰有倭寇 上幸平壤事急后妃家將不
相及公以儀親 上雅信之令寄屬之遂從

上丙其明年由工曹佐郎為高敞縣監方師旅
之際國大飢人相殺食公能畫辦以賑飢於是
兩湖流民千數而北方之親戚故人飢寒客者
日且數百公躬自薄以給人所活千百人由是
名益顯四年以事責罷縣父老遮道乞留於方
伯民間爭出軍餉以贖其罰既不得則皆涕泣
如失親戚後歷治數郡治常第一澹泊居無室
廬出無款段家屬苦貧公下以為意居家篤於

祭祀仁於宗族平生言不及臧否得失性敦厚
愛人然見一不善相對不與言人羞之寧撻之
於市猶恐其得過於公以敦寧僉正當光海時
十年不遷六十六歿葬廣州西龜川里遠近來
吊者至五六百人妻李氏亦國族 贈承旨鏗
之女生二男二女長子某以科第顯爵至同中
樞次子善慶縣監婿二人府使崔珪士人趙成
後又庶出女一人為楊湜妻某生司果元祿女
一人適郡守權聖源又有後出子元禎元祉善
慶生縣監元禧外孫八人叅奉崔碩量奉事崔

毅量趙澆趙澆趙沆趙浣楊萬紀楊萬齡又崔
氏婿四人察訪李翰嚮進士金栻安鉉柳重殷
皆有子孫蕃衍至百餘人信一有德者之報也
公初以從 上勞錄原從 贈承旨後以長子
貴故加 贈吏曹叅判李氏為貞夫人銘曰
德鉅而施博其賁於身者夥耶位卑而食薄以
待其子孫者夸耶

贈兵曹叅判許公墓表

公諱鉤字直中姓許氏許氏出自駕洛新羅末
有諱宣文事麗祖有功食采孔巖子孫遂為孔

巖人世有名入達者高宗世有諱珙位至僉議
中贊謚曰文敬至今東方諸許多祖文敬公文
敬公八世有諱琛位左相謚文貞於公為曾祖
祖諱礪左贊成父諱埴典獄署主簿追贈吏
曹參判母高靈朴氏大司諫仲幹之女明宗
幼時常出閭閻遇公為同年生戲嬉日相得或
云公因少名上賜名為鈞上既即位初授
禁火司別提轉內膳寺直長陞典牲署主簿尋
改司憲府監察連補外歷井邑青山和順皆有
治績又為果川沃川不赴後拜尚州判官當

宣祖二十三年時有倭人獻孔雀公歎曰此大
亂之兆可以去矣即棄官歸其明年果有倭寇
國大亂公浮海至湖西故相澈體察兩湖起公
為禮山縣監辭不起復拜唐津縣監其年歿於
官年六十一宣祖二十六年六月五日也時
當師旅飢饉道不通旅葬邑居之傍後二十四
年返葬畿甸許氏先葬在長湍者七世自公始
葬富平之黔丹山下公器識卓異少讀書自負
其才三十四舉國子試終不得博士科選命也
平生簡潔凡五為郡邑家苦貧公晏如也公初

娶宗室平原監女無子後娶僉知樞府全義李
文淑女生曙曙以武力登甲科爵至同中樞嘗
以長湍大都護為京畿右防禦使例 贈公兵
曹參判孫男女五人男緯緯綽綽綱女嫁吳達榮
又有庶孽孫男女三人男曰緝膺二人尚義唐
其崗內外曾玄孫二十餘人 仁祖二年五月
五日李夫人歿迺紼葬同原前夫人墓在古廣
州治北舊川里平原世葬

議政府舍人姜公墓表

姜舍人諱克誠字伯實晉山君希孟之玄孫晉

山君生掌隸院司評鶴孫司評生順天都護府
使台壽為伯父右議政龜孫之後於公為皇祖
考皇考諱復以門子初授忠佐衛司勇早世公
生於嘉靖五年丙戌以竹醉日生故號醉竹公
既少孤外祖金文敬公教育之天資穎悟有異
材日誦累千言學日成致名譽嘉靖二十五年
我恭憲元年選國子試三十二年癸丑擢大科
又三年選重試文益名初選翰院入玉堂由正
字至應教兩司至執義司諫都堂為檢詳舍人
嘗賜暇書堂 上遣中貴人宣醞既酌中貴人

迺出 御題五帝詩宣言即日製進既日暮矣
公攝醉即應製既進 上稱歎之 賜良馬一
匹一時傳誦之將大顯矣有不悅者媒孽之見
斥幾十年放跡江湖吟哦自娛更自號保晚堂
嘗有詩曰朝衣典盡酒家眠賜馬將謀數頃田
珍重國恩猶未報夢和殘月獨朝天我 昭敬
即位感而思之特召為濟用監正尋出為長湍
都護府使歿年五十 淑人昌寧成氏故安東
大都護府使謹之女生三男三女先慶宗慶皆
以文學進先慶為闕東道都事宗慶為成均館

學諭少子世慶初以門地得仕為掌隸院司議
壻三人李廷弼李用擇權霽廷弼為永春縣監

成均館學諭姜公墓表

公諱宗慶字 別號梅墅醉竹姜舍人之中
子生而聰明天資絕倫於書一過眼終身不忘
善談易一時諸儒多許之者隆慶四年我 昭
敬三年庚午選國子試三年壬申擢大科薦翰
林有當路者去之仕止國子學諭萬曆四年舍
人公歿又四年母成淑人歿未卒喪羸毀卒年
三十八客嘗問疾與語良久自切脉曰吾不見

明日此時客恠之歿而果驗云公能通歧黃之術耶抑得數而推之耶何其異也以公才識卓越名譽早著將期其大用矣不幸早世嗟乎命也孺人申氏先亡憐其穉子欲依嘗與成牛溪先生故義州都護金公某最相善臨絕托寄其二子以故晉昇養於成氏晉昭養於金氏兩家之世相傳愛之如親骨肉為義談於後世云孺人僉正申汝樑之女長子無暉亦以才學著聞為司園署別提次晉昇生貞次晉昭歙谷縣監胥三人鄭得悅李致愛李惟仁得悅為泗川兵

馬都尉萬曆二十五年死於關山之敗晉昭有長子祜後以乙科進方出為清州

贈花興君張公墓碣銘

張氏出自新羅羅亡有太師吉與羅之亡大夫謀事高麗滅甄壹今嶺南安東府有太師廟張氏子孫不絕君子以為樹德之報後世有諱思吉事我 太祖 太宗有功貴顯封花山府院君卒謚僖襄七世有諱榮以門蔭為保安道察訪於公為皇考妣宜寧南氏公諱甲奎字上爾少有至性善屬文二十五得選監試二場擢第

二名文譽益著其後累屈於大科遂不復求舉
卜居臨津之上自號松林散人樂閑暇吟詩自
適以至壽考梧里李相國與為布衣交深相善
宣祖三十七年定中興元功會盟新舊功臣公
以功臣之世資滿例陞折衝將軍為副護軍後
三年冬歿壽七十九公初娶漢陽趙氏義絕後
娶青松沈氏生仲仁時公六十七歲公歿後仲
仁始仕 仁祖世尋得科第推遷今為海州牧
使嘗以振武原從推恩 贈公戶曹參判襲封
花興君母沈氏為貞夫人公初葬揚州述堂里

上之二年十一月改葬長湍之古東坡 仁祖
十四年大狄兵沈夫人避亂湖西歿因旅葬於
咸悅至此乃合葬焉夫人國初名臣青松伯沈
德符之後也夫人既發孀治家教子如嚴父人
稱張氏婦人之賢七十八歿仲仁無嫡子有庶
孽子斗八公又有庶出子曰仲孝仲孝生戴銓
曰
松林青江水漪樂且壽恬熙

記言別集卷之二十四終

記言別集卷之二十四終

